

Ametsen ituna

E

derrak dira bai, Ixiar, Yeats poetaren hitzak edo pasartea: “Zure oinen azpian zabaldu ditut nire ametsak, goxo ibili beraz, nire ametsen gainean baitzabiltza”. Esanahi asko bilbatzen dituena, edota egoera askotan aplikatu daitekeena. Niri neuri, ekainaren 11n Lehendakartzan egindako Euskara Aholku Batzordearen bilera datorkit gogora. Urtebete luzez, hau da, gobernu aldaketaren ostetik, bildu gabe ginen eta *Itun berri baterantz* izeneko Euskara 21 egitasmoarekin bukatu genuenez aurreko legegaldia, behingoz, alderdi guztien oniritzia lortutako dokumentuarekin, bada, jakin-mina genuen euskara aholku batzordekideok harako dokumentuaren ibilbidea zein izango ote den ezagutzeko, gobernu berria egindako lanaz eta lortutako kontsentsuaz baliatuko ote den jakiteko, eta, jakin-mina baita, aurrerantzean Euskararen Aholku Batzordearen egitasmoak eta lan-lerroak zeintzuk izango diren jakitera emateko.

Lopez lehendakari jaunak egin zion bilera-ri sarrera, Urgell andreak Gobernuaren lerro ideologiko nagusiak aipatu zituen kulturari eta euskarari dagokionean eta Auzmendi andreak azaldu zituen, ondotik, Euskara Aholku Batzordearen zereginak datozen urteotarako.

Hiru ideia geratu zitzaizkidan: bata, Urgell andreak, euskara ez dagoela galtzeko zorian baieztatu zuela. Euskara dakiten hiritarren kopurua igoz doala aipatu zuen, euskararen egoeraren gainean egin izan diren etorkizuneko irakurketak alarmistatzaitez. Bestea, Auzmendi andreak Euskara Biziberritzeko Plana berrikusi eta Euskara 21 garatzea izango direla aipatu zuela Euskara Aholku Batzordearen lan-ardatzak.

DANI BLANCO



Ana Urkiza



Padrón



Rozas

Baina lehenbizi, Euskara Biziberritzeko Plan Nagusiari (EBPN delakoa) izena egokitzetik hasi beharko dugula, bere hitzak erabiliz, “euskarak ez baitu biziberritzeko planik behar, bizirik dagoenez gero”. Eta hirugarrenik, Gobernuak politikoki oso markatuak dauzkan ildoak marraztu dituela, oso

bide zuzena baina estua erakusten dutenak.

Eta hiru ideia hauekin, Yeats poetak bere esalditxo horretan aipatzen duena bezalaxe sentitu ginela esan nezake gehientsuenok: “...goxo ibili beraz, nire ametsen gainean baitzabiltza”.

Han ginen, bai, José Luis, betiko nasan, zutik, ordu hartan ordu hartakoak, baina berriro objektu arantza baten aurrean paratu ginen susmoa daukat. Euskara eta horren inguruan pizten diren gogoeta, bizipen, esperientzia eta sentimendu ororen aitzinean. Eta politikari dagokio arantza diren objektu konplexu guztiak gertatu ohi den bezala, objektu horiei arantza kentzen saiatzea edota arantza diren larruei buelta ematen jakitea.

Behingoz, Euskara 21 itunarekin lortu zelakoan geunden: denon ametsak arrautza otarra berean jarri genituelakoan; eta goxo genbiltzalakoan, bai baikenekien, guztien ametsen gainean genbiltzala.

Hauxe beraz eskatuko nioke nik orain gobernu berriari eta legegaldi berrian lan egingo duen Euskara Aholku Batzordeari: ez ditzagula, animaliek egin ohi duten bezala

– bizirauten jarraitzeko makinatzen dituzten tranpetatik ihes egiten-gure lan indarrak xahutu, eta ekin diezaiozula ehuntzeari; hau da, aurreko lanen hondakinetatik sortutako humusa profitatzeari, guztien ametsen oinarria baita, eta arantza askotatik, jada, nahiko askea. ■



Euskara Aholku Batzordeari eskaera: ez ditzagun, animaliek egin ohi duten bezala –bizirauten jarraitzeko makinatzen dituzten tranpetatik ihes egiten-gure lan indarrak xahutu eta ekin diezaiozula ehuntzeari

